


NDI MUMANYÈ

 Neya bushuwa ne twètù tudi cisàmbà cya dyèsè bwa kusanganyiibwa kaaba aka mu dinda emu, kwikalakù ne mwoyi pa buloba apa, bwa kumònakù cikwabo cikondo cya dicyònkómoka cya Paasàkà. Paasàkà ùtu misangu yònsò anu ùtùtwàdila cintu cya—cya butùmbì bwa dikèma, ditèkemena dipyadiyà. Nenku—nenku cya butùmbi kaayi's wè!

² Ne ndi mwenzè anu mbwela mu cibambalu paanyimà lwà pàapa mu dinda emu, muntu kampànda kutwilanganayè naanyi ne kwambayè ne: “Mwanèètù Branham, udi mumanyè mwànà mukese wa mu dibòkò, anyi mwànà mukese, anyi muntu kampànda, uvwabò basambidile mu Chautauqua cidimu cishààle, uvwabi bikèngela bwa kulòpolabò mwoyi, ne kulongololabò mijilu ya nshìbàshìba anyi cintu kampànda awu.” Yèyè ne: “Mwànà awu wàkondopiilwa, ne ùdi mu citanda emu mu dinda emu, bwa kwamba menemene, ne mmusòmbe kaaba aka mu dinda emu.” Pa nanku abi mbìmpè, netùpetè bujaadiki bukese abu kùdiye pàmwàpa kumpàlà kwa twètù kufika ku disangisha dikwabo adi. Nenku twètù's tudi cisàmbà cya dyèsè.

³ Mpindyewu nèndombè bwa Mwanèètù Neville ní ùdikù mwa kwenza kubala kwa Mifùndù ya Maatàayi anyi Luukà, ewu anyi ewu, ya dibìikà dya ku lufù, piikalàbi ne kanwèna banjì kuyibala. Nukàadi bayibalè anyi, mwanèètù? [Mwanèètù Neville ùdi wàmba ne: “To.”—Muf.] Pa nanku, patùcìdì tudìlongolola bwa disambila apa.

⁴ Nenku mpindyewu cyàlondà ewu mudimu, neciikalè mudimu wà dyondopa. Paanyimà pàa ewu mudimu mumanè kujika, dîbà adi nuyàaya ku didyà dyenu dya dinda. Pashiishe, paanyimà pàa aci, netwàlukilè pa dîbà citeema ne tusunsa makumi asatu bwa kubanga mukwabo mudimu. Ne pashiishe midimu ya dyondopa neyìlondè aci. Ne pashiishe midimu ya dibàtiiza neyìlondè aci.

⁵ Kàdi cikondo cya dibàtiiza ncilenga cya dikèma's! Kaa, ekèlekèle! Dibìikà dya ku lufù! Ki bwa cinyi tudi tubàtijiibwa, mbwalu Yèyè wàkabiika ku lufù.

⁶ Ndi mvùluka kumpàlà kwa twètù kupeta ciinà cya dibàtiiza mwaba ewu, mvwa ne ciibidilu cya kuya naabò ku musùlù lwà kwìnshì eku, pa dinda bwebwebwe, maadìndà a citaleela cyenzè bu cya cyùmisha mashi aci, ne mbàtiiza bantu ku musùlù aku. Kùdi cintu kampànda mu cyòci aci, cìdì cyènza anu ne, ncikondo cinsantu. Paasàkà, ncikondo cya butùmbi.

Mvwa ntàngila Mwanèètù Pat Tyler udi musòmbe mwab'ewu ewu.

⁷ Mvwa anu nyikilangana ne muntu kampànda makèèlèlè dilòòlò awu, ne, disangisha dyetu dya musangu mushàale mu Oklahoma, ngàkateeta bwa, ndi nteeta mpindyewu (ne nêmfilè dimanyisha dya bwalu ebu) bwa kutèeka ku luseke too ne pàvwà Nzambi mwa kumbiikila bwa kucyènza, mudimu wànyì wà bwambi wà kale wà dijingulula awu, bwalu ndi ngeela meeji ne (bwa kubanga) ki—ki mudimu wà bwambi mupyamùpyà wùdi wùbangà.

⁸ Dilòòlò adi, muntu nansha umwe kàyi mucimanyè to, mêmè kuwùteetela pa mwànà uvwa mupicile pa cibumbà cya ku cyambilu apa, uvwa mulela mpofo, mwànà wa mu dibòkò; mwikàle anu mpofo wetù wa menemene ewu, mwànà wa balùme wa bidimu biipacila ku dikumi ne bisambombo. Ki dyàkàmwè kwelayè lubilà lukolè ne: “Mwanèètù Branham, ndi mwa kumòna!” Ne pòpò apu, ne Pat ùvwa . . . Ty- . . . mwimàne pabwìpì apu, anu ku luseke menemene kwa mwànà wa balùme awu, pàakatàbalà mèsù èndè bwa musangu wèndè wà kumpàla kacya bàmulela. Nenku ndi ne dyeyemena dya ne nwènù bàdì apa, ne myoyi yizùka aba, pàmwè ne mêmè mwine, ndi mwindile cintu kampànda, bwa Nzambi àtwènzèlè, ne kutùbàndisha mu cipidi cikwabo cishìilàngàne ne citùdi eci.

Twìnyikààyaaku mitù yetu mpindyewu bwa disambila.

⁹ Taatù wetù wa mu Dyulu wa Musàngèelu, patùdi badisangishe mu dinda emu apa, mu ekeleeziya mukese ewu ku luseke lwa njila, tudi cya bushuwa ne kusàkidila Kùdi, bwa cidì byònsò ebi bitwàmbila, ne nangàngà mu dinda edi dya Paasàkà. Bu ne kàkùvwakù Paasàkà to, nunku katwènakù mu ngiikàdìlù utùdi leelu ewu to. Bwalu, Paasàkà ngudi mutwè citampì ku milayì yònsò ya Nzambi. Yèyè ngudi mutùshindikileyi. Byònsò bikaadi Yekù mulayè, byàkavwijii bwa byònsò bya cya bushuwa dya Paasàkà adi. Dimwè dya ku matùkù a matàmbe bunene a ditwà dya cyanga ditùdiku mwa kwikala naadi mu cidimu! Nenku tudi baswè kulòmba, Mukalenge, leelu ewu, bwa Ùsambèkù myoyi yetu, patùdi basòmbe bindile apa, ne biikàle ne myoyi yizùka bwa Nyuma Mwimpè, Wàkalwa paanyimà pàà Paasàkà awu, bwa àlwekù pa myoyi yetu ne àtùsàmbè, ne àlujululèku diitabuuja dyetu, mu bipiminu binènè bya bukolè, bwa twamònakù mwa kwikala ne nsòmbelu udi Yesu mutùlongòlwele bwa kwikala nendè.

¹⁰ Tudi baswè kusambidila muntu ne muntu yònsò bu muntu-nkààyà, ne nangàngà bwa aba bàdì bakàngila mu màlokò ne kabàyikù mwa kulwa mu masangisha mwaba nansha wùmwe leelu ewu. Nzambi, ikàlàku naabò. Nenku swàku—swàku Paasàkà ewu àpetè Paasàkà mulelèlè bwabo bòbò, dibiikà dya pa bulààlù, ne bukolè bwa mubidi bupyabùpyà bùdìbo kacya kabàyikù banji kumanya kwònsò eku kacya bààbàlela to. Enzàku nanku, Mukalenge.

¹¹ Swàku bwa muyiishi yònsò, musadidi yònsò údi Wèwè nende pa buloba bujimà leelu ewu, udi munkaci mwa kutwà cyanga bwa civùlukilu cinène eci, swàku bwa bàpetè dilaabiibwa ne dikàndà ne Bukolè, bwa kutwàdilabò masangisha àbò (mikooko yidi mindile ayi) Cyàkudyà cidì naaci Nzambi mu cibùcilu bwa cisàmbà Cyèndè. Enzàku nanku, Mukalenge. Tudi bindile bwa cyetu peetu citùpà, ne kudipwekesha kwònsò, mu Dìna dya Mukalenge Yesu Kilisto. Amen.

¹² Nèndombè mpindyewu Mwanèètù Neville bwa kubalayè Mifùndù ya dibìlkà dya ku lufù. [Mwanèètù Neville ùdi wàmba ne: “Maataàyi 28,” ne ùbala Mufùndù wùdi wùlondà ewu—Muf.]

[*Ku ndekeelu kwa nsabatu, pàkaavwà dìbà dibangè kuya ku kabundubundu mu ditùkù dya kumpàlà dya lumingu, Màriyà wa ku Magàdàlà ne Màriyà mukwabo awu bàakalwa bwa kumòna lukità.*]

[*Kàdi, mònaayi, kùvwa kwenzèke dizakala dinene dya buloba; bwalu mwanjelo wa Mukalenge ùvwa mutùùlùke mufùme mu dyulu, ne mulwè mubùngùlùje dibwe divwà ku ciibi, ne musòmbepù.*]

[*Kwìsù kwèndè kùvwa bu mukenyi wà mvùla, ne civwàlù cyèndè citòòke bu nējè.*]

[*Ne bwa bwòwà bwa bwalu bwèndè balami bàakazakala, ne bàakalwa bu bantu bafwè.*]

[*Ki mwanjelo awu kwambilayè bakàjì abu ne: Kanùumvu bwòwà nansha; bwalu ndi mumanyè ne nudi nukèba Yesu, uvwa mupoopèdiibwe pa nkùrusè awu.*]

[*Kèna mwaba ewu to; bwalu mmubùike ku lufù, muvwàye mwambè amu. Lwàyi, mònaayi mwaba wùvwa Mukalenge mulàadika.*]

[*Nenku ndàayi lùkàsà, nùkambilè bayiidi bèndè ne yèyè mmubùike ku bafwè, ne, mònaayi, ùdi ùndyànjidila mu Ngalèlà; mwòmò amu ki munwàmumwènà; mònaayi, ki mèmè wanwàmbidi awu.*]

[*Ki kuumukabò lùkàsà ku lukità ne bwòwà ne disànkà dinene, ne bàakaya lubilu bwa kutwàdila bayiidi bèndè bulubà abu.*]

[*Kàdi pàrvàbo bàya bwa kambila bayiidi bèndè apu, mònaayi, Yesu wàkatuutakeena naabò, kwambayè ne: Wetwàwu bònsò. Nenku bàakalwa ne bàakamukwàta ku makàsà, ne bàakamukuukwila.*]

[*Dìbà adi Yesu wàkabàmbila ne: Kanùumvu bwòwà nansha; ndàayi nùkambilè bânà beetu bwa bàye mu Ngalèlà, ne mwòmò amu ki mwàmmwènàbo.*]

[Mpindyewu pàvwàbo bènda bàya apu, mōnaayi, bàmwè bàà ku balami bààkabwela mu cimenga amu, ne bààkaleeja banene bàà ku baakwidi maalu ònsò àrwà menzèke awu.]

[Nenku pààkamanàbo kudisangisha ne bakùlù, ne babwelè mu cipàngù, bààkapèèsha bàsàlaayi mfrangà yàbùngì,]

[Bàmba ne: Nwǎmbàayi ne: Bayiidi bèndè mbalwè ciibufùku, ne bamwibè pàvwàbo balààle apu.]

[Ne bu bwalu ebu mwa kufika ku maci a ngwènà, twètù netùmutwìshishè, ne netwàngatè bukùbì bwènu.]

[Nenku bóbò bààkangata mfrangà ayi, ne bààkenza mùvwàbo balongèshìibwe amu; nenku ngaakwilù ewu mmutangàlake munkaci mwa beena Yudà too ne ku leelu.]

[Pashìishe bayiidi dikumi ne umwe kuyabò mu Ngalèlà, ku mukùnà kùvwà Yesu mubàpèèshìle cipungidi aku.]

[Nenku pààkamumònàbo, bààkamukuukwila, kàdi bàmwè bàvwa ne mpatà.]

[Nenku Yesu wàkalwa ne wàkaakula naabò, wàmba ne: Bukolè bwònsò mbumpèèbwe mu dyulu ne pa buloba.]

[Ndàayaaku, nùkalongèshè bàà mu matùngà ònsò, nubàbàtiiza mu dìnà dya Taatù, ne dya Mwànà, ne dya Nyuma Mwìmpè,

[Nubàlongesha bwa kulama maalu ònsò àndì munùtùmìne dīyì.] Nenku, mōnaayi, ndi neenu dībà dyònsò, too ne ku ndekeelu kwa buloba. Amen. Katùpà kàà mukàbà wà mèyi munda mutupù.]

¹³ ...àsakidilèku mabènesha Èndè ku kubala kwa Dīyì Dyèndè.

¹⁴ Mpindyewu tudi baswè kwamba, kumanyisha cyàkàbidì mpindyewu ne, masangisha, ne bwa mu dinda, neàtungunukè pa dībà citeema ne tusunsa makumi asatu, patùdi anu tujikija edi, cya . . . disangisha dya mu dinda edi mpindyewu. Nenku dībà adi tudi twinyika edi ne ndisangisha dyetu dya dijuuka dya dībà. Nenku tudi, tudi ne àmwè maalu a kunùmanyisha pa bidì bitàngilà ma—masangisha àdì menzèke. Nenku tudi baswè bwa nwènù bàdì bàsaamà ne bàdì mu ntàtu, nwènù bònsò, nùlwe ne diitabuuja mu dinda edi, bwa kwitabuuja ne Yesu udi mubiike ku lufù awu ùdi ne mwoyi leelu, ne Ùdi anu umwèumwè awu mùvwàYe kwònsò aku amu. Kí mMushintùlùkekù to nansha kakese.

15 Mpindyewu ndi muswèku kubala katùpà kakese kàà Mufùndù mwab'ewu, kàdi kàsanganyii bwà mu nshapità wa 19 wa Yobò, kubangila ku mvensà wa 15.

Aba bàdi basòmbèle mwànyì mu nzùbù, . . . basadidi bàànyì bakàjì, bàdi bàmbala bu mwenyì; ndi mwenyì ku mèsù kwàbò.

Mémè kubùikila musadidi wanyì, kàdi kànyì ùmpèèshakù mémè dyandamuna to; ndi mumusèngèlèlè ne mukana mwànyì.

Mupùuyà wà mukana mwànyì mmwenyì kùdì mukàjàànyì, nansha mùndì musèngèlèlè bwa bwalu bwa bàna bàànyì balela bàà mubidi wànyì sungasunga.

Eyowa, bàna batekète mbapeetùle; pàmvwà njuuka, bàvwa bààkula bibì bwànyì.

Balundà bàànyì bònsò bàà pa mwoyi ndi mubàkwàcìshe bwòwà, ne aba bàmvwà munangè mbankùdìmùkile.

Yànyì mifùbà yikaadi milamàte ku dikòbà dyànyì ne ku misunya yànyì, ne ndi mupàndùke anu bwa bikùnkumù bya ménù àànyì.

Ngumvwilaayikù luse, ngumvwilaayikù luse, Éyì nwènú balundà bàànyì, bwalu cyanza cya Nzambi ncyeci cindengè.

Nudi nunkèngesha mùdì Nzambi ùkengesha bwa cinyì, ne kanùyikù basànkìshùbwe ne mubidi wànyì?

Kaa! méyì àànyì ìkalakù mpindyewu mafùnda! Kaa! ìkalakù mafùnda ne kasàlà mu mukàndà's wè!

Ìkalakù masonga kashidi pa dibwe ne kasàlà kàà cyamù cifùke ne kàà cyamù cya plomb.

Bwalu ndi mumanyè. . . mupikudi wanyì ùdi ne mwoyi, ne yèyè neìmanè ku ditùkù dya ndekeelu pa buloba;

Ne nansha paanyimà. . . misàndà ya mu dikòbà mibùtùle mubidi ewu, nansha nanku mu mubidi wànyì mémè nèmmonè Nzambi;

Úngààdìmwèna mémè mwine, . . . wikalà mèsù àànyì mwa kutàngilà, ne kàyì a mukwabo to, nansha twonyi twànyì twoshìke tulungùle munda mànyì.

16 Ndi muswè kwangata bu cyena-bwalu mwômò amu, cìsanganyii bwà mu Yobò 19 emu ne: *Ndi Mumanyè.*

17 Nkambwa ewu mu cyôci cikondo eci ùvwa mu mushindu kampànda anu mutùdì twètù leelu ewu emu. Ùvwa mu ntàtu mikolè, mutùdì tucibùikila ne, “wàmba kupweka ne màyi,” ne yèyè ùvwa mushùikile. Matùkù abùngì ùvwa kacya anu wàsomba pa mushiki wà butù, ne ùvwa ùteeta kupetakù

mèyi bwa kumusàmba, ùteeta kupetakù cintu kampàndà cìvwà cìfwànyìne kumukolesha ku mwoyi, ne cintu kampàndà cìvwà cìfwànyìnekù—cìfwànyìnekù kwikala busàmbi kùdìye pàvwàye ùmòna mwoyi wèndè wènda wùya mutàngile ku bajàngi.

¹⁸ Cya kumpàla, ùkaavwa muntu mununu, wa bidimu bitwè ku makumi citeema, ne ùvwa mutuucìibwe kùdì cianza cya Nzambi. Mpindyewu, tudi bamanyè ne Nzambi kàvwa mumulengè ne cianza Cyèndè Yèyè to, kàdì Nzambi ùvwa mwanýishile Sàtaanà bwa àmulengè. Nzambi ùtu anu ne byamù bya mudimu bwa kwenza maal. Nzambi Yèyè muswè bwa cintu cibì kwenjiibwaci, Udi anu ùlekelela Sàtaanà bwa kucyènzayè yèyè. Kàdì pàdìYe muswè bwa cìmpè cyènjiibwè, Ùdi ne basadidì Bèndè bàdìYe ùlekelela bwa kucyènzabò.

¹⁹ Nenku Sàtaanà ngwàkalenga Yobò mu kiipàcila kampànda, bwa kumuteeta, bwalu yèyè ne Nzambi bàvwa badyè lupiku. Nenku Nzambi wàkambila Sàtaanà ne: “Ndi ne musadidì pa buloba, kakwèna muntu nansha umwe udi bu yèyè to. Cyònsò cìNdi mmwambìla, yèyè neàcyènzè. Mmuntu mupwàngàne, ne muntu mwakàne.”

²⁰ Kàdì Sàtaanà kwambayè ne: “Wèwè anu mundekèle mémè mumutwè byanza, s'nèmmufikìshè ku diKwela milawu muKutàngile mumpàla.”

²¹ Yobò, kàyi mumanyè biine bintu bìdì munkaci mwa kupitakana ebi to, kubwejacì nkambwà awu mu dikèngà dikolè. Pààbi, nansha nanku, byònsò pàakamujikàbi, wàkashààla anu kacya wàlama kaaba kèndè mu—mu Kilisto. “Ndi mumanyè ne Mupikudi wanyì ùdi ne mwoyi,” mwàkambaye.

²² Mpindyewu twètù tutu tufika pa myaba ayi. Twètù bònsò. Ne ndi ngeela meeji leelu ewu ne, tudi basangile mwab'ewu bwa cintu kampànda bu cya kiipàcilà kamwekamwe aku. Tudi bònsò pa mishikì ya butù. Tudi ne yetu ntàtu, ne ètù mabika ne mala, ne byetu—byetu bikondo bibi, ne ètù mabèèdi, ne ètù màsaamà a myoyi, ne dyetu dyediibwa dya màyi ku makàsà. Pa nanku tudi tulwa mushindu ewu, mu dinda nunku, mu dinda edi dya Paasàkà, bwa kupetakù mèyi a busàmbi, mùvwà Yobò ùteeta kuàpetela kù balundà bèndè amu.

²³ Nansha umwe wa kùdìbo kàvwakù mwa kumupèèsha busàmbi nansha. Bwa lutàtù lwèndè alu, bòbò bàvwa bàmfùnda mùvwàye ngènzàmpèkààtù wa mu musokoko. Pashìshe, munkaci mwà lutàtù lwònsò alu, Nzambi wàkalwa bwa kumusungila.

²⁴ Yobò ùvwa ùdyèla nkonko, bu mùvwàye mumanyè, kacìvwa anu bubèèdi bwèndè ne byùjà byèndè, ne lutàtù ne màsaamà a mwoyi, bya ku dijìmiya dya dìkù dyèndè ne bubanji bwèndè bwònsò abu, bìvwà byàmba kwangata mwoyi wèndè abi to, kàdì yèyè ùkaavwa muntu mununu, mukòòke, ne mumanyè ne ùkaavwa ne makàsà matàngile ku ciina. Nenku, mwikàle

mumanyè ne, ùwva mwitàbùùje ne kùvwakù anu muntu kampànda wákamufikisha pa buloba, kàwva anu mwa kwikala mudifikile yèyè mwine pànwapa to. Nenku ùwva mumanyè ne yèyè ùwva mufùme kùdì taatù ne maamù kampànda, kàdi, nansha nanku, taatù mwine awu ne maamù awu bàwva ne cya kwikala ne muntu kampànda mubàlelè. Nenku civwa cifwànyine kwalukila too ne ku cibangidilu ku ne: “Wákalela mwine wa kumpàla awu, ki nganyi?”

²⁵ Nenku dîbà adi ùdyèlapù nkonko. “S’ncintu cya dikèma’s cya ne ki mèmè ewu, ngenda ngendakana, mwoyi mutùmbùke kutàmba wà nyama, ne mwoyi mutùmbùke kutàmba mwoyi wa micì.” Kàdi tudi tusangana ne yèyè wákamba ne: “Muci wòwò mufwè, s’newikalè cyàkàbìdì ne mwoyi. Ne cilòngò cyòcì cifwè, s’neciikalè cyàkàbìdì ne mwoyi.” Kàdi kwambayè ne: “Muntu yèyè ùdì ùtèèka mutù panshì, ùkùùla mwoyi, kàdi wèpì? Bânà bèndè bàlwa bwa kumudila ne kumupà buneemè, kàdi kàyi ùbìjingulula to.” Nenku ùwva ùdyèla nkonko ne: “Bwalu bùwva cinyi bwa—bwa Nzambi mufwànyine kulekela mwoyi wà mushindu awu wíkala cyàkàbìdì ne mwoyi, bu mùdì bilòngò ne micì, kàdi muntu kàyikù yèyè mwa kwikala cyàkàbìdì ne mwoyi?” Byònsò ebi byàkamutàcisha.

²⁶ Kadi bu twètù anu mwa kufila nkomeni ewu mu dinda emu’s. Kàdi’s ki citùdì balwilè kaaba aka. Tukàadikù batèèleje bwalu-bulonda bwa Paasàkà, misangu ne misangu, ne babùbalè babalùlùle; ne leelu ewu, ku tudyòmbà twenu, nenùmvwè bambi bashiilèshiiilàngàne bàcilenga. Kàdi cìmvwà mèmè mwelè meeji, bwa kasùmbù kàànyì kakese mu dinda emu, kàdi Mukalenge mumpèèshe aka, ndi mufwànyine kucilengela mu mmwèneni mushiilàngàne mèmè ne mushindu, mfika ku kaaba kàà ne: Bwa cinyi tudi tufika ku ntàtu eyi? Cìdì civwijà biinè bintu ebi ncinyi? Bwa cinyi mwena Kilisto mmufwànyine kwikala ùpampakana? Bwa cinyi byònsò, kabìyikù bifwànyine anu kwenda bipwàngàne bwa mwena Kilisto? Kàdi kabyèna byènda nanku to, ne twètù tudi bacimanyè.

²⁷ Ne mîngà misangu tutu ne ntàtu patùdì tulwa beena Kilisto kutàmba mutùvwà naayi patùcivwà bangènzàmpèkàatù. Mu bushuwa bwa bwalu, nCifùndìbwe ne: “Ntàtù ya mwakàne yidi yàbùngì, kàdi Nzambi ùdì ùmusùngila ku yònsò ayi.” Nzambi ùtu mulayè ntàtù yàbùngì, njiyà ya pabwàyì, ne bintu bya pabwàbi bìdì bifwànyine kupita kule ne kule lwètù luumvu, kàdi bitu byènzeka misangu yònsò anu bwa dyàkalenga dyetu. Twètù katwèna anu mwa kubyùmvwa to, bwalu, twètù tubyùmvwa, kì ncifwànyine dîbà adi kwikala diitabuujà bwetu twètù to; tuvwa bafwànyine kwenza maalù ku luumvu kampànda. Kàdi tudi tubyènza, ne tudi naabì, ne tudi twitabuujà ku diitabuujà, Dìyì Dyèndè, bwa ne nebyènzè cintu kampànda cya cìmpè bwetu twètù. Bu ne tuvwakù mwa kuumvwa aci leelu ewu, pa dinda edi—edi. Bu ne tuvwakù mwa kumvwa ne ntàtù yetu yònsò . . .

Kàdi kakwèna nansha umwe wa kutùdi udi mutwibwe cisàlù cyàyì to. Ne bu ne tuvwakù mwa kufika ku dyumvwa ne bintu abi bìdi mbwa dyàkalenga dyetu's wè!

²⁸ Mbifùnda, mu wùmwe wà ku Mifùndu mu Bible, ne: “Mateeta àdi àfidiibwà kutùdi aa, àdi ne mushinga mukolè kutùdi kutàmba ne ngòlò yèyè mwine, bwalu Nzambi ngudi utùpèèsha ôwò mateeta aa.” Paanyimà pàà twètù bamanè kushààla cintu Cyèndè, ditonda dyetu ne dibàtijiibwa dyetu, ne mulayì wètù wà dyènda mu nsòmbelu Bwèndè Yèyè, dîbà adi diteeta dyònsò dîdi ditùvwilà mbwà kutùpwàngaja bwa butùmbi Bwèndè. Mbwà kutùfikisha ku kaaba kàà Nzambi mwa kutàmba kuDìvwija wa cya bushuwa kutùdi kutàmba mùvwàYe kumpàlà kwa diteeta kulwadi.

²⁹ Ndi muswè kudìsanga ne Yobò mu dinda edi, bwa kwamba ne ndi mulààle pànu ntàntà bule bukùmbàne bwa kumanya ne m'Bulelèlà. Nkàadi mucimònèmòne mu nsòmbelu wanyì sungasunga ne, musangu wònsò wùdi bwalu bukòlè bùjuuka, bùndi nciyi mwa kucinguluka, anyì kupìcila mwinshì anyì pamutù pààbù to, Nzambi ùtu ùpenga njila, ne ùpàtukamù ne butùmbi. Ntu anu ndikonka mùdì ngàsà Wèndè ùcyènza's, kàdi Yèyè ngudi ucyènza.

³⁰ Nenku vùlukàayi ne, mu maalu ònsò aa, Sàtaanà ùtu ùteeta kutùvwija babìndùlùke, ne ùtùlùndula, bwa kutùfikisha ku dyela dya meeji ne: “Kaa, *ebu* bwalu bwènzèkì bìshi? Bwa cinyi ncìvwakù mufwànyine kwikalala mushindù *kampànda*?”

³¹ Kwènjì ndambu wa matùkù pàmvwà mpàtuka mu mwaba wà mutàmbe bulenga, ne mutàmbe kwikalala wà wùkòka ntèmà wùnkadiku pàanyi mumòne kacya bándela, civwa nanzùbù munene wa mwanèètù, Oral Roberts. Pàngàakamòna mabwe a matòoke mafinùnùke awu anu pa ôwò, ne kakùyì dìdidiishì nansha òmwè mwaba kampànda to, kàdi mushindu mwine wùvwàbi byenza's wè! Kàdi nkàadikù mufikè mu Hollywood ne mubwelèbwèle mu nzùbù ya bukalenge ya bamfùmù, ne nkàadikù mufikèfike myaba yònsò yìdi mwa kwikalakù ayi, pabwìpi ne yònsò, pa buloba bujimà, ne myaba yònsò ne nzùbù ya yikèmeshangana, milenga ayi, kàdi ncìtukù mumòne cintu nansha cimwè, mwaba nansha wùmwe, wà difwànyikija, ne cyòci aci to, mwaba nansha wùmwe. Mushindu wùvwà nshinga ya aluminium milukakaja mu—munda mwònsò, ne, kaa, kacya ncìtukù mwanjì kumòna cintu cya cikòka ntèmà nàka mu nsòmbelu wanyì yònsò to. Pàngàakabwelàmu, ne kwangata byanza byanyi ne kulaaba ku makunji awu, ne—ne granite mulenga awu; ònsò awu mu mmwènekèlu wa búsàtù bwa Taatù, Mwànà, ne Nyuma Mwîmpè, ne bipaapu byàci byo—byondola. Bintu byònsò abi's! Ncìcivwa anu mfùmuna kwa Mwanèètù Tommy Osborn, ne mumòne mudimu wèndè munene wà makànda kuntwaku, bwa Mukalenge.

32 Mémè kwimanyina lwà pambèlu apu, kutàngila paanyimà ku nzùbù awu, ki mémè kudyàmbidila ne: “Nzambi, ncyà bushuwa ne mémè ndi mulwè mwena lubombo’s, s’ncyà bushuwa ne ndi mulwè muntu mwipata, mwaba kampànda; bwalu, midimu ya bwambi ya bantu aba’s mmifùmìne ku wànyì mémè.” Ki mémè kudyàmbidila ne: “Cinyì? Pàmwàpa mémè ndi mutàmbe kwikala wa kabàyi bèèyemena’s, Mukalenge, mu mushindu wà ne Wèwè kùyìkù mwa kungeeyemena ne bya nanku to. Nansha tundola tukese mene, tuncii tÙdì umpàku mushindu wà kufuta bwa maakàmpanyè ne bikwabo atu, patùdì twakulangana apa nyewu bàkaadi bàteeta bwa kuntùma mu bùlokò bwa ciine aci. Kàdì ndi mwena lubombo wa mushindu awu bwa cinyì, anyì mbwa cinyì bùndì muntu wa mushindu ewu wa kabàyìkù mwa kweyemena?”

Mvwa pa mushikì wà butù, mùvwà Yobò wa kale awu.

33 Pàngààkiimanà pambèlu apu, nciyìkù mfika ku dikwàta mwoyi to, bwa ngiikàdilù wa ùkèmesha wa mushindu awu; cìdì mwànà wa balùme mupèlè mulelela mu kaabwàtù kàà mucì, mwena Mpenta kampànda, mufwànyìne kwenza kàdì kulwa naaci kucùbweja mu nzùbù munene wa kàntùmbwadyùlu awu’s. Ki mémè kudyàmbidila ne: “Éyì Nzambi, pàmwàpa mémè ncyèna mukùmbànyìne to.”

34 Anu dībà adi kaaDīyì kakese kupwekelakù mu kajila aku, kwambakù ne: “Kàdì Mémè’s ndi cyebe citùpà cikwabanyina.”

35 Dībà adi mémè kudyàmbidila ne: “Éyì Mukalenge Nzambi, kaa, bishaalèku anu mushindu awu, dībà adi’s, Mukalenge. Ndi...bwalu ncyèna mufwànyìne kwikala ne meeji bwa kutùngunuja mudimu bu nanku Bwebe Wèwè to. Ne mémè’s ndi muntu mu—mupangè mukàndà. Kàdì, paùdì Wèwè anu cyànyì citùpà cingaabanyina, mémè ndi Webè, nenku Wèwè neùndombòlè. Ncyèna mufwànyìne kudilombola to. Kàdì, Éyì Mukalenge, ndombòlèku!”

36 Mèbà a bwalu butondè awu ngàdì àtùsàka ku nsenga minsantu ayi. Cìvwa mu Bible. Nenku vùlukàayi ne, dikèngà nansha dyòdì dinene dya bishi, Sàtaanà kènàku mwa kwangata mwoyi wèbè pàdì Nzambi kàyi mujikijàngàne neebe to. Kakwèna cintu nansha cimwè cìdì mwa kukwenzekela pàdì Nzambi kàyi mucyànyishile to. Kakwènakù bwalu bubì bùdì mwa kulwa pàdì Nzambi kàyi mubwànyishile to. Ne ciine aci mbwà dyàkalenga dyebe bùdìYe ùcyènza. Twànjàayìbì kwela meeji.

37 Pààkalwà mvùla bwa kubùtula buloba apu, kayìvwakù mwa kubùtula Noà nansha. Noà yèyè kàvwakù mwa kubùtudiibwa to, bwalu Nzambi ùvwa ne mudimu wa kwenzayè.

38 Dìngà ditùkù mu ditùngà dinene kampànda mu bupika bunene, mùvwà bânà kampànda bàà beena Ebèlù batùdì bamanyè ne n’Shadràkà ne Meeshàkà ne Abèdènègò. Nenku

kufikabi mu mushindu wà bikèngela bwa kwangatabò dipàngadika, bwa cintu kampànda kwenjiibwaci. Bàvwa ne... Diitabuuja dyabo—dyabo—dyabo dyàkeediibwa ku diteeta.

³⁹ Ne pàdi diitabuuja dyebe dyèdiibwa ku diteeta, dîbà adi kupangidikù to. Shààla wèwè anu ne cyùdi mwitàbuuje aci.

⁴⁰ Nenku pààkeediibwà diitabuuja dyabo ku diteeta (Ne bôbò kufikabò mu dîbà dya bwalu butondè, bôbò kabàvwa bayè anu ku mushiki wà—wà butù nkààyaawù to, kàdi bààkabwela mu cikùtù cya kapyà, kàdi Sàtaanà kàvwakù mwa kubàbùtula to, bwalu kiipacilà kàà Nzambi kakàvwa kanji kukùmbana to.), bàvwa mwa kuyamù ne ditèkemena edi ne: “Ndi mumanyè ne Mupikudi wanyì ùdi ne mwoyi!” Bàvwa mwa kuyamù ne ditèkemena edi ne: “Tudi batwìshìibwe ne Nzambi ùdi ne bukolè bwa kutùsùngila ku cikùtù cya kapyà eci, kàdi, nansha nanku, katwàkwinaminakù lupingù alu to.”

⁴¹ Sàtaanà kàvwakù mwa kubàngata to. Kàvwakù mwa kushebeya Nowà mu màyi a mvùla awu, pàvwà kiipacilà kàà Nzambi kakàyi kakùmbàne to. Kàvwakù mwa kwosha bàà bàà beena Ebèlù abu, pàvwà kiipacilà kàà Nzambi kakàyi kakùmbàne to. Kàvwakù mwa kushebeya Yobò ku byùjà ne ntàtu, pàvwà kiipacilà kàà Nzambi kakàyi kakùmbàne to. Anyì nyama ya ntambwe ayi kayìvwakù mwa kudyà Danyèlè, pàvwà kiipacilà kàà Nzambi kakàyi kakùmbàne to. Anyì lufù ne bukùlákàji kabìvwakù mwa kwangata Abraham, pàvwà kiipacilà kàà Nzambi kakàyi kakùmbàne to.

⁴² Anyì lwòlò kalwènakù mwa kukwangata mèwè, anyì kalwènakù mwa kungangata mèmè, pàdi kiipacilà kàà Nzambi, bwa mwoyi wètù, kakàyi kakùmbàne to. Pa nanku, tudi tupeta mwaba awu, disàmbiibwa.

⁴³ Kàdi Nzambi ùdi ùlekela ntàtù yìlwa bwa cinyi? Nzambi ùtu wèla lutàtù mu nkànu, ùlwèla bikànù mukana ne ùlùfikisha ku diMukòokela, ne ntàtù ayi yitùfikisha mu bwobùmwè bwa sheemàsheemà ne Nzambi.

⁴⁴ Kakùvwakù mwanzankòngòlò to anu too ne pààkalwà mvula wa Noà awu. Kàdi paanyimà pàà Noà mumanè kucincimikiibwa mu ngiikàdìlù uvwayè ùsanganyibwa awu, bwa kulèlemayè matùkù makumi anaayi a muunya ne a bufùku, mu cipeepèlè cikolè cya mvùla, ne kaabwàtù kakese aku kàtànkanangana mu màyi amu; mpàanyimà pàà mvùla awu mumanè kujika, pààkamònàye mwanzankòngòlò awu bwa musangu wèndè wà kumpàla, cipungidi cya ditèkemena aci, cipungidi cya mulayi aci. Paanyimà pàà yèyè mumanè kupicila mu dikènga, pashìishe mpààkamònàye mulayi awu.

⁴⁵ Mushindu awu ki wùdì umòna mulayi, paanyimà pàà wèwè mumanè kupicila mu dikènga. Mèmè ntu munangè kasàla aku, anyì musambu awu:

Ndi ne cya kwalujiibwa kumbèlu ku Dyulu
 Mwambwila pa bulààlù bwa maalu mapeepèle
 bulengeja ne bilòngò anyi,
 Pàdi bakwàbò balwangàne mvità bwa kupeta
 difutu
 Ne bapicile ne mâtù mu mbù ya mashi?

46 Twètù tudi tulòmba dicyankama ne ditalala. Nzambi udi utùpèèsha cidi citàmbe bwimpè cidiYe mufwànyine kutùpèèsha aci: mateeta ne makènga. Ki cidi citàmbe dicyankama ne ditalala bwimpè. Dyetu dicyankama's didi anu dishiyà dya musùlù.

47 Bivwa ntoo ne pààkabwejiibwà bânà bàà beena Ebèlù ku bukolè mu cikùtù cya kapyà, mu dimwè dya ku mateeta àbò a pabwàwu adi, ki kumònabò Kampànda mufwànàngàne ne Mwànà wa Nzambi mwimàne munkaci mwabo. Ntàtù yabo yàkatwàla Mwànà wa Nzambi mwimàne munkaci mwabo, mu tumpeepèle tatalàle, bwa kupuupija divwala dya luuyà adi. Kàdi ntoo ne pààkabwelàbo mu cikùtù cya kapyà pààkamwènekà Musàmbi awu.

48 Ûvwa n'Danyèlè uvwa mudipàngàdikile munda mwa mwoyi wèndè bwa ne kàvwa mwa kudìkooyisha ne bintu bya pa buloba, ne wàkapicishiibwa ku bukolè ku diteeta, anyi ùvwa mwa kusambila Nzambi anyi kuya mu bwina bwa ntambwe. Kàdi pàvwa mpààkateemeshiibwà luuyà alu, ne kwediibwayè mu bwina bwa ntambwe, ne, paanyimà pàà cyòci aci, mpààkamònàye Mwanjelo wa Mukalenge mwimàne munkaci mwèndè, munkaci mwa kulama, Dikunji dinene dya Kapyà adi diimàne pankaci pèndè ne nyama ya ntambwe. Ne nyama ya ntambwe ayi kayivwa mwa kufika pàvwàye apu to, bwalu yèyè ùkaavwa mupicile mu mateeta ne mateeciibwa ne mu ntàtù. Ne yèyè ùvwa mumanyè ne Nzambi ùvwa ne bukolè bwa kumusungila ku cyòci aci.

49 Ûvwa ng'Abraham, paanyimà pàà mumanè kumòna buloba bwàtùke, ne mushipu mulwè, ne Lotà mutàpùlùke nendè ne muyè bwa kasòmbela munkaci mwa maalu a pa buloba mu nsòmbelu wa musheemè. Pàvwa mpaanyimà pàà yèyè mumanè kuumvwa minungànyì ne myadi ya—ya balami bèndè bàà bimunà, kabàciyi ne mashindà bwa ngombe yèndè to, kàdi wàkashààla anu musòmbèle mu buloba bùvwà Nzambi mumupèèshe ne mumwambile bwa kwanjiyè kusòmbelamù abu. Nenu ku mwàkadibi mu ditùkù adi ne, paanyimà pàà yèyè mumanè kuteeciibwa too ne pààkafikà lutùulù lwèndè—lwèndè ku ndekeelu, divwa nditùkù adi, paanyimà pàà diteeta dimanè kujika, pààkaakulàye ne Elohim cìmonààmèèsù mwinshì mwa mucì wà nsànga ditùkù adi. Pàvwa mpaanyimà pàà yèyè mumanè kukènga mu mateeta èndè awu, paanyimà pàà yèyè mumanè kupicila mu ntàtù yàkapicilàye ayi, pààkamumwènekèlè Nzambi mu mmwènekèlu wa Muntu; ne musòmbè mwaba awu ùmwambila mùvwàye musèlàngàne ne

mùvwà mukàjèndè dìnà dyèndè Sarah, ne mwambe mùvwà mukàji awu muMusekè, mu nrentà paanyimà apu. Mwaba awu ngwàkaMubiikidilà Abraham ne “Elohim.” Pàvwa mpaanyimà pàà diteeta ne dikènga.

⁵⁰ Kaa, bu Ekeleeziya mwa kuDìnyùkushakù ne kutàbulukakù leelu ewu, bwa kusangana ne paanyimà pàà ntàtù ne mateeta, ne tuseku ne dyelulwila, bintu bidì Ekeleeziya mupìcilèpìcile abi, Ekeleeziya wa Mpenta awu, ne ki patùdì tumòna Nzambi munkacì mwetu, wènza bimanyinu binène, ne maalu a kukèma.

Paanyimà pàà midimu mikolè ne ntàtù ya ditùkù,

Paanyimà pàà byòbì byònsò bimanè kupìta,
Dìbà adi netùmonè Yesu ku ndekeelu.

Yèyè neikalè mungindile,
Yesu mulenga kumòna ne mulelèlà,
Pa nkwasa Wendè wa butùmbi mulenga awu,
Yèyè neàtwàkidilè Kumbèlu
Paanyimà pàà ditùkù dimanè kujika.

Pàdi ditùkù dicìkàlekù apa, tùkwatààyi mudimu mukolè.

⁵¹ Bantu banene bònsò aba, bàdì bafwànyìne kutwàngata citùpà cinènè cya disangisha dyetu dya dinda edi, bwa twètù baswè kubwela mu dyamba nenku. Bààkapìcila mu mateeta, ne bààkamòna Nzambi. Bààkapìcila mu mateeta, ne bààkamòna Banjelo. Bààkapìcila mu mateeta; ne mabuulula, ne bààkamòna bimanyinu ne maalu a kukèma, ne bikwabo.

⁵² Kàdi, kaa, nansha umwe wa kùdìbo kààkamònakù cyàkamònà Yobò to. Bantu bònsò abu, paanyimà pàà bamanè kumòna Banjelo, ne kumòna Nzambi ne bintu byònsò ebi, kabààkamònakù cintu nansha cìmwè cya cìbàpèèsha ditèkemena dya dyàmwàmwà dya lukitá to. Kàdi Yobò yèyè wàkamòna dibìikà dya ku lufù! Wàkamòna Paasàkà. Wàkamòna cintu cidì cikànkamika mwoyi ne mwoyi wònsò. Pashìishe pààkacimònàye kwambàye ne: “Éyi mèyi àanyi ìkalakù mafùnda ma mukàndà’s wè! Éyi bwa kwikalawù matonkona ne kasàlà kàa cyamù, pa dibwe’s wè!”

⁵³ Nwamònu’s, cyòcì, maalu ónsò àkaavwa mamukùdimùkile. Bèndè, nansha beena mudimu bèndè mene kabàcìyìkù mwa kumwakwisha to. Mukàjèndè ùkaavwa mwenyi. Ki yèyè awu musòmbe, pa mushikì wà butù, diteeta dinene adi. Ki ekeleeziya kulwayè, ne kumwelabò nyimà, munda mwa matùkù mwandamutekète. Kàdi wa kumukànkamikakù ùdi aku anyi ùdi kùnu!

⁵⁴ Dìbà adi yèyè ùvwa ne cya kwikalala mumòne cikèènà-kumòna cya Paasàkà, pààkeelàye lubilà ne: “Ndi mumanyè ne Mupikudi wanyi ùdi ne mwoyi, ne mu matùkù a ndekeelu Yèyè neimanè pa buloba. Ndi mumanyè! Éyi bu mèyi àanyi mwa kwikalakù mafùnda ne kasàlà kàa cyamù, mu dibwe, bwa

mèyì àànyì kaàpecikù mushindu wà kujiminawù to, bwalu ndi mumanyè ne Mupikudi wanyì ùdi ne mwoyi! Ndi mumanyè! Ndi mumanyè!”

55 Cyùdi mumanyè ncinyì, Yobò? “Ndi mumanyè ne Mupikudi wanyì ùdi ne mwoyi.” Nukààvwakù bamòne’s, kakùyì anu ne kùvwa Kampànda ne mwoyi to, kàdi Yèyè awu ki ùvwa Mupikudi bwa Yobò!

56 Kaa, Dìna dya Mukalenge dībeneshiibwè’s wè! Mémè ndi ne disànkà be m̀ndì citùpà cya Paasàkà, m̀ndì citùpà cya dibìikà dya ku lufù adi! Ne twètù tudi citùpà cyàdi mu dinda emu, bwalu munda mwetu mmusòmbèle Mwoyi wà dibìikà dya ku lufù (mbwena kwamba ne, mwabanyanganyi) wàkatwalà Paasàkà awu. “Ndi mumanyè ne Mupikudi wanyì . . .” Cyùdi mumanyè ncinyì? Ncyèna munkaci mwa kucifwikakaja to; twètù tudi ne bya difwikakaja byàb̀ngì be leelu ewu. “Ndi mumanyè ne Mupikudi wanyì ùdi ne mwoyi!” Eyowa’s, mukalenge.

57 Mpindyewu Yèyè awu ùvwa nganyi? Pìikalàbi ne Yèyè ùvwa ne mwoyi, Ùvwa Mupikudi bwa Yobò. “Wanyì,” wa nkààyendè, *wanyì*, “Mupikudi wanyì ùdi ne mwoyi!”

58 Ne cikwabo cyùdi mumanyè ncinyì, Yobò? Udi mumòne cinyì mu cikèèna-kumòna aci? “Ne mu matùkù a ndekeelu, Yèyè neìmanè pa buloba. Ne nansha misàndà ya mu dikòba mibùtùle mubidi wànyì, kàdi mu musunya wànyì mémè nèmmonè Nzambi, Yèyè ùngààdimwènà mémé mwine. Ndi mumanyè ne Mupikudi wanyì ùdi ne mwoyi, ne Yèyè neìmanè pa buloba ku ditùkù dya ndekeelu. Nansha bu twonyi twànyì twoshike munda mwànyì, nansha misàndà ya mu dikòba mibùtùle mubidi wànyì, kàdi mu musunya wànyì mémè nèmmonè Nzambi.” Nkwòkò aku kùvwa cikèèna-kumòna cya citàmbe bunene aci.

59 Danyèlè wàkamòna Mwanjelo. Bàna bàà beena Ebèlù bààkamòna Mwàna wa Nzambi. Noà wàkamòna mwanzankòngòlò. Abraham wàkamòna Nzambi, cimònaamèèsù. Kàdi, Yobò yèyè wàkamòna dibìikà dya ku lufù, Yobò ùvwa mwindile ne mwoyi mujimà. Bankambwà bònsò ne bansantu banene, bàà mu Bible abu, bàvwa bindile ne disànkà dyònsò dyòdi ditùkù adi ne mwoyi mujimà; biikàle ne ditwishiiwà, ku bikèèna-kumòna byabo abi, ku mabuulula àbò awu ne, kùvwa mwa kulwa cikondo cya dibìikà dya ku lufù.

60 Mpindyewu’s nyewu tumòna byenzedi binène byènzeka. Tudi tumòna makolè manene a Nzambi. Tudi tumòna bintu binène bìvwàYe mwa kwenza. Kwèna mufwànyine kutàngila díbà dya muulu ne—ne kupanga kumanya ne m’Bukolè bwa Nzambi bùdi bùfikishà buloba abu ku dinyùngulukila ku díbà adi to. Kwèna mufwànyine kumòna cikondo cya muvù wà bintu bitòloka wùlwa kùyì umanya ne kùdikù Nzambi to. Udi mwa kumòna dyondopiibwa dya mèsù a bufofo, maci a bumpudimaci, kumanya ne n’Nzambi awu. Kàdi ambà t̀ng bu ne ki cyònsò

cìvwàku, ne paanyimà pàà twètù bafwè ki biyiidi? Kàdi dibìikà dya ku lufù, Paasàkà, kaa, s'ki cyàkatwà citampì ku byònsò bikaadìku Nzambi mulayè, s'cìvwa ndibìikà dya ku lufù.

⁶¹ Nénku's bídì bìkèngela bwa kupetabò dipoopediibwa dya pa nkùrusè, kumpàlà kwa wèwè kupeta dibìikà dya ku lufù. Ne kumpàlà mene kwa Ekeleeziya kwikalakù mwa kumòna Bukolè bwa dibìikà dya ku lufù, kumpàlà mene kwa mèmè mwine kumònakù mudimu mupyamùpyà wà bwambi wènzeka, kumpàlà mene kwa wèwè kubwela mu bwobùmwè bupyabùpyà ne Nzambi, bìkèngela kwikalèku didipoopela dya pa nkùrusè bwa kulwakù dibìikà dya ku lufù. Bìkèngela tùfwe ku meeji ètù sungasunga, tùfwe ku njila yetu sungasunga, tùfwe ku byònsò bídì bitùnyùngùlùkìle, tùpìcilè ku mateeta ne makènga, bwa twètù kumòna dibìikà dya ku lufù dipyadìpyà, Mwoyi mupyamùpyà. Kumpàlà kwa ngènzàmpèkààtù kupetayè mwa kulwa mwena Kilisto, bìkèngela kulwè lufù kampànda, pashìishe dibìikà dya ku lufù.

⁶² Kumpàlà kwa Abraham kupetayè mwa kumòna Elohim, byàkakèngela bidimu makumi abidi ne bitaanu bya dyediibwa dya ku diteeta. Kumpàlà kwa bânà bàà beena Ebèlù kumònabò Mwànà wa Nzambi awu, byàkakèngela bwa kubwelabò mu cikùtù cya kapyà. Kumpàlà kwa Danyèlè kupetayè mwa kumòna Mwanjelo, byàkakèngela bwa kubwelayè mwa bwinà bwa ntambwe. Kumpàlà kwa Yobò kupetayèku mwa kumòna dibìikà dya ku lufù, byàkakèngela bwa kubwelayè ne kujìmija byònsò bivwàye naabi; kàdi pashìishe, ku cikèènà-kumòna, kumònayè!

⁶³ Kàdi pìikalàbi ne ku cikèènà-kumòna Yobò wàkiima ne mwoyi wùmwe pa mulayi, ambàayaaku tũng mutwàpangà twètù aba kucyènza, paanyimà pàà Kilisto mumanè kubiika ku bafwè ne mulwè Mamuma a Misòmù a aba bàdi balààle tulù, ne mutùme Nyumà Mwìmpè bu citampì cya mulayi, pambidi peetu, bwa twètù kwikala peetu ne mwoyi. “Bwalu Mèmè ndi ne mwoyi, nwènù nudi penu ne mwoyi!” Pa kumòna Bwikadi Bwendè bunene munkaci mwetu, bùkwàta mudimu, bwènza bimanyinu bimwebimwe ne maalu a kukèma byàkenzàYe pa buloba abi, biikàle bitùpèèsha ditèkemena. Nénku tudi tulwa ku dibìikà dya ku lufù, ne pashìishe tushàala pa mishiki yetu ya butù anyi? Tùùmukààyaaku pa mushiki wà butù awu leelu ewu, biikàle ne cikèènà-kumòna cipyacìpyà, ne Bukolè bupyabùpyà, ne dikàngà dya mwoyi dipyadìpyà bwa twètù kumòna Nzambi mu Bukolè Bwendè. Tudi tumòna dibìikà dya ku lufù dya bintu bicìvwavwà.

⁶⁴ Tudi ku cikondo cya lufù. Tudi basòmbe mu biibi bya lufù. Matùngà àdi mu biibi bya lufù.

⁶⁵ Russie mmujandùle cingoma cipyacìpyà patùdi twakulangana apa, munùvwà nwènù bònsò bumvwè ku tudyòmbà ne bikwabo. Kabyèna bìkèngela bwa kulwilabò mùneemu bwa kucitaayisha ne bòmbè to. Bàdi mwa kulwa anu

ne kaacintu kakese muneemu emu, ne kubwela munkaci mwa batentekedi baabo, ne kukupa kaacintu kakese mu ditunga kana dyonsò, ne bantu bõnsò baci bukila panshi munda mwa mēbā makumi abidi ne anaayi. Dya bālwa nanku, panūdi nutābuluka ku tulū, kwikāle mwaba awu mwena Russie ūkukūma musēbē mu lubadi, mulami munene wa beena Russie ūkunyēnga nzūbū, ūkwāta mukājēbē ūlāāla nendē ku bukōlē, wimansha bānā beebe mu njila, ne wāngata nzūbū webē. Bōbō's bādi mwa kucyēza. Kī mbafwānyine kujīmija cintu nansha cimwē to. Bōbō bādi naaci. Muntu kī mmumanyē ne ncinyi to. Nwamōnu's, byōnsò biya anu kumpāla's. Mpindyewu bōbō bādi mwa kukwāta mudimu ne cyōci aci kabāyikū bāciciina to, bwalu muntu mukwabo nansha umwe kēna naaci to.

⁶⁶ Katwēna bamanyē mwālwāci, ne ciine cyēnzekā aci to. Kādi tudi bamanyē cintu cimwēpelē, ncyā ne tudi pa mushiki wā butū. Ditunga, didi pa mushiki wā butū. Bāa pa buloba bādi pa mushiki wā butū.

⁶⁷ Nenu bu mūdī bāa pa buloba pa mushiki wā butū, mēmē ndi ne disānkā dyābūngī dya ne Nyuma wa Nzambi ūdi mwa kulwa, ne twētū mwa kwamba ne: “Ndi mumanyē ne Mupikudi wanyī ūdi ne mwoyi, ne ku ditūkū dya ndekeelu Yēyē neimanē pa buloba apa!” Dīngā ditūkū Yēyē neālwe! Kabyēna bikēmesha to mwākafūndā mwedi wa kasālā ne:

Mwikāle ne mwoyi, Yēyē kunnanga. Ūfwa,
Yēyē kunsūngila.
Mujiika, Yēyē kwangata mpekaatu yānyī kuya
naayi kule.
Ūbiika ku lufū, Yēyē kumbingisha pātupū bwa
kashidi.
Dīngā ditūkū Yēyē neālwe, kaa, ditūkū dya
butūmbi's wē!

⁶⁸ Byākakēngela Getsēmānē, wa mamata a Mashi āpātukila mu dikōbā Dyēndē, kumpālā kwa ciine aci. Ne byākakēngela dikēngā dya pa lufū dya lwonji ku Kālvariyo, kumpālā kwa kulwakū cileeji cya Nzambi wa Cyendeleele Uvwa mwa kujuula bafwē awu. Byākakēngela—byākakēngela Getsēmānē ne Kālvariyo, bwa kwenza Paasākā. Ncyā bushuwa ne byākakēngela nanku.

⁶⁹ Mushindu ūvwā bapostolo abu, mu dinda adi, pākaavwābo batekēte mu mabōkō anu menemene apu, mu mushindu wā ne Peetēlō wākamba ne: “Ndi mutekēte mu mabōkō be, ngeela meeji ne nēngānjī anu kwalukila cyākābīdī ku dilōba. Nēngālukilē. Mēmē—mēmē's mvwa muMumōne.”

⁷⁰ Bāvwa ne ditēkemena dikōlē, ne biitabuuja ne bikwabo byōnsò, too ne mwākālwakū dībā dinene dya mīdimā adi. Cīvwā Nzambi munkaci mwa kwenza aci ncinyi? Ūvwā ūfikisha bapostolo abu ku mushiki wā butū. Ūvwā ūbāfikisha mu

mushindu wà bafwànyìnekù—bafwànyìnekù kupeta diitabuujà dyabo dibàshindikila.

⁷¹ Ki Peetèlò kwambayè ne: “Mémè—mémè’s ndi muMumòne wènza bishimà binène mu Ngalèlà mwàmwa. Kàdi, kaa, Nyawu mulààle kuntu kwàka, mufwè, ne mukwàte mashika, mu majambu! Ngeela meeji ne nêmpwekè anu ku mbù mu dinda emu ne nkeelèku bukòndò, ne nkalòbèku anu cyanàànà. Pàmwápa ndikù mwa kutàpa dísù luseke lukwàbo lwà mbù lwàlwa, ne nênjandulè bwalu. Ndi mMuvùluka pàvwàYe mutwìndile ku mwelelu aku. Ngeela meeji ne nêngǎnji anu kuya.”

⁷² Ki bapostolo ne: “Udi mumanyè mùdi bwalu anyi? Ngeela meeji ne mémè nênye anu neebe.” Kaa, bàvwa ne mwoyi wùsaama’s. Bàkaavwa badilè myadi too ne mwàkabùlà mèsù.

⁷³ Mushindu mwine wutùdi bamanyè mwa kupìcila mu myaba ayi’s wè! Mushindu mwine wutùdi bamanyè’s wè! Twètù bônso’s tudi bamanyè bintu abi.

⁷⁴ Ndi mvùluka pângààkalààdikà kampànda wa musinga mukolè mu lukità, ku lusongo lwa kakùnà kwàka, kùdìbo bàbìikila ne nku Esètè, anyi ku Nkità ya ku Walnut Ridge kwàka. Mushindu wùngààkalààdikàmù mwànà mukese wa mu dibòkò’s wè! Ne ngàkadidila pa dibòkò dya mamwèndè apu, too, ngàkadila too ne mùmvwà nciciyi kabidi mwa kudila to. Ngàkenza byònsò bìmvwàku pàanyi mumanyè abi. Mu mushindu wà ne, mémè kwangata cingoma, bwa kuteeta bwa kudishebeya, mvwa mu cikondo cya bwalu bukolè. Ne pàvwà mpa dìbà adi, mu kaacibambalu kakese kuntwaku, mutwè binù, pààkunuzulukà Maulu, ne mémè kumumòna mwimàne mwàmwa mu bulenga bwa dibènga kufwà. Mùvwa mmu dìbà adi mungààkumvwà mabòkò èndè manjingile ku makaaya, wàmba ne: “Bill, wèwè kwèna umvwa to. Twètù tudi bimpè kule ne kule kukutàmba wèwè.”

⁷⁵ Nwamònu’s, bikèngela dipoopediibwa dya pa nkùrusè. Bikèngela dikàmiibwa dya cilòngò, bwa kupàtulamù mànànanshi. Bikèngela dikàmiibwa dya mwoyi, bwa kupetamù cidi citàmbe bwimpè cidimu aci. Ki bwa cinyi byàkakèngela bwa Yesu kukàmiibwaYè, bwa kupàtula civwàYe. Yèyè kàvwa mwa kwimana kumpàlà kwa dipoopediibwa dya pa nkùrusè, kwamba ne: “Bukolè bwònsò mu Maulu ne pa buloba mbufla mu cyanza Cyànyi” to. Kàdi paanyimà pàà dipoopediibwa dya pa nkùrusè, Yèyè ùvwa mwa kwimana e kwamba ne: “Makolè ònsò mu Maulu ne pa buloba mmafla mu cyanza Cyànyi!” Kàdi cyàkenza cinyi? Byàkanji kukèngela dipoopediibwa dya pa nkùrusè.

⁷⁶ Byàkakèngela dikàmiibwa ne ditekeshiibwa dya mu mabòkò dya bapostolo. Bàvwakù bamòne Musùngidi wabò, Uvwabò banangè, ne baMumòne mene ùjuula mufwè mu—mu lukità awu. Bàvwakù baMumòne wènza aci. Kàdi pashiishe bàdyàmbidila

ne: “Ki Yèyè udi mulààle wàwa, mukwàte mashika, mu lukità, Yèyè mwine, mu dinda emu.” Byàkakèngela . . .

⁷⁷ Bantu bàvwàku baMumòne ùtábaja mèsù a bampfofo abu, baMumòne mwimàne kwàka ùjingulula meeji miine àvwà mu myoyi ya bantu: “Mmunyìs mùvwàYe kàyikù ùmanya,” mùvwàbo bafwànyine kwamba’s, “ne bòbò abu bàvwà bàlumbatangana Nendè? Ùvwa ùmanya bìshi’s? Bwa cinyi Yèyè kàyikù ùmanya ne Yudààsè, Yudààsè ùvwa—ùvwa mwa kuMudiila citungu? Bwa cinyi Yèyè kàyikù ùmanya ne bàsàlaayi bàvwà bàlwa kuulu kwa mikùnà kwàka, biikàle ne misongolo ne myelè ya mvità ne bikwabo byònsò, bwa kuMukwàta, pìikalàbi ne Ùvwa mwa kujingulula meeji àbò?”

⁷⁸ Nwamònu’s, dyabùlù ngùvwa ùkwàcila mudimu pa bòbò awu, mwikàle ùbàtèeka pa mushikì wà butù, bwalu bàvwà baswè kubàpèèsha bujaadiki bwa ne “Ndi mumanyè.” (Kabùyì bwa ne “Ngeela meeji” anyi “pàmwàpa bìdi nanku” to.) “Ndi mumanyè! Ndi mumanyè!”

⁷⁹ Nénku vùluka ne, mateeta awu mmatwàla pambidi peebe mushindu anu wumwewumwe awu, bwa kwìkadi wàlwa kwamba n’á ne: “Ee, pàmwàpa Eci cìdi mu cyòci, pàmwàpa Mufùndù ewu mmulelèlè, pàmwàpa dyondopa dya kùdi Nzambi ndilelèlè, pàmwàpa Nyuma Mwímpè ngwa cya bushuwa” to. Kàdi paùdi upeta dilabula adi ne umuka pa mushikì wà butù awu, ne upeta dibuulula dya Nzambi, ku dibàtiiza dya Nyuma Mwímpè, udi mwa kwela lubilà lukolè ne: “Ndi mumanyè ne Mupikudi wanyì ùdi ne mwoyi, bwalu Yèyè ùdi ne mwoyi munda mwànyì!”

⁸⁰ Peetèlò kwambayè ne: “Nénye kalòba.” Bapostolo abu kwambabò ne: “Ngeela meeji ne mèmè nénye anu neebe.” Nénku bàvwà pa mushikì wàbò wà butù, munkaci mwa mbù mwàmwa, ne lutàtù kacya lwàmòngana mùvwàlu amu. Ne mèmè ndi mwa kuumvwa umwe wa kùdìbo wàmba ne: “Kaa, mbifwànyine kwenzeka bìshi’s, Peetèlò? Cintu bu nùku ncifwànyine kwenzeka bìshi’s bwa Muntu wa mushindu awu mufwànyine kufwà? Mmunyì mùdiYe mufwànyine kwediibwa mu lukità mushindu wèdiibùYe awu? Mmunyì mùvwàYe mufwànyine kutwàla bwa ùbàlekela bàMutwìla makòdi mwìsù ne bàMutùùla myedi, bàMwasa cifulu cya butumbi aci ku mutù? Mmunyì muvwàYe mufwànyine kwenza nanku’s, kaa, ne mwikàle anu Nzambi? Mèmè ncyèna anu mbyùm vwa to.” Kaa, dyediibwa kaayi dya màyi ku makàsà!

⁸¹ Kàdi dyàkàmwè, mbenzè anu bàtàngila ku mwelelu wà musùlu aku anyì, dibuulula dya mushindu anu wumwewumwe dyàkapetà Yobò adi, ki kumònbò cyàkamònà Yobò kùkaavwa bidimu binunu binaayi kumpàla aci. Ki Mupikudi uvwa mwimane wàwa, mwikàle ne mwoyi ne bukolè, mwimàne ku

mwelelu aku. Ne mudilu muteemesha, ne mishipa miipikapù mushindu awu, ne wàmba, ubàbìikila.

Yesu ùdi ne meesa maadija
 Kùdi bansantu bàà Nzambi bàdiishibwa,
 Ùdi ùbìikila cisàmbà Cyèndè cisungula ne
 “Lwâyi nùdye;”
 Ùdi cya bushuwà ùdiishangana ne manà Èndè
 Ne ùkumbaja dijinga ne dijinga dyetu dyònsò;
 Kaa, byôbì's, mbya kalolo be bwa kwikala
 kudya ne Yesu dîbà dyònsò!

Mushindu mwine wutùdiku mwa kwela meeji awu, mwàkakèngelàbi bintu binène byònsò abi's wè!

⁸² Mushindu wùvwàbi ne...mupostolo Pòlò, mupostolo munene wàkapìcila mu cikondo cyèndè cya lutàtu awu pàakadimwènàye lufù lwà Stèfanò; ne kumònayè mpàla wèndè mukese awu mutàngija mu Dyulu, ne mabwe àmutuuta mumpàla, ne kutàngilayè muulu ne kwambayè ne: “Ndi mmòna Maulu muunzulula. Ndi mmòna Yesu mwimàne ku dyàbalùmè dya Nzambi.” Yèyè ne: “Mukalenge, kùbàbadìdiku mpekaatu ewu to.” Ne Pòlò mwambùle binkutu abi, cyòci aci kumutèekaci mbingu ne mbingu pa mushikì wà butù, ùtwa paanyima ùtwa kumpàla; mu mushindu wà ne, meeji èndè àkaavwa makooyike, too ne pàkaavwàye ùsanganyibwa mu njila wa ku Damàsèkè, bwa kuteeta bwa kulwàngana bwa kuumukapù, byenzè bu muntu wa wènda ùya ku mùlàngì wà wiskì, ùteeta bwa kupwàku tunynganyinga twèndè mwoyi.

⁸³ Ùvwa munkaci mwa byôbì abi, pàakalwàku Dìyì dyùmukila mu Dyulu, Bukènkè bunene bwa bùkenka kwambaBù ne: “Shawùlà, Shawùlà, udi uNkèngesha bwa cinyi?” Yèyè kuMumòna. Yèyè kuMujingulula ne, Ùvwa n'Yesu mubiishibwe ku lufù awu, Ùvwayè mudimwène ùfwa awu ne, ùvwa mujuukè ku lufù.

⁸⁴ Kaa, ndi mwa kuvùluka nsòmbelu wanyì sungasunga, mu njila ngenda nya ku kabùtù, pàngàakumvwà Dìyì dya kalolo ne: “Ndi Yesu. Musangu kampànda Mvwa mufwè, Ndi ne mwoyi bwa kashidi. Bu mùNdi ne mwoyi, udi peebe mwa kwikala ne mwoyi.” Kacya anu diine dîbà adi, mutèekè cyànyì cyanza mu Cyèndè, ntu muMweyèmène mu dipicila dya mu myaba ya mìdimà. Pàdi bikondo bilwa bindi ncìyi mwa kumòna, nì nnjila kaayi ùndì ngenda ndonda, ndi anu muMweyèmène.

⁸⁵ Bikèngela bwa mwena kwitabuujà yònsò mwena Kilisto ewu àsakiibwè mu mateeta awu. Bikèngela bwa mwena kwitabuujà yònsò mwena Kilisto ewu àteekiibwè pa mushikì wa butù awu, bwa wàmònakù mwa kupàtuka ne dilabula dya ne: “Ndi mumanyè ne Mupikudi wanyì ùdi ne mwoyi!”

⁸⁶ Katwèna tulwa mwab'ewu mu dinda emu anu bwa kusòmba ne kuyiikilangana pa bwalu kampànda bwa maalu-malonda

nansha, nansha mùdibu bwònsò anu bulelèlè, kàdi tudi balwè mwab'ewu ne bujaadiki mu dinda emu ne: “Ndi mumanyè ne Yesu Kilisto ùdi Mwànà wa Nzambi, ndi mucìmanyè kakùyikù mpatà nansha mikese to! Ndi mumanyè ne Yéyè mmubiike ku bafwè, ne Ùdi ne mwoyi munda mwànyì leelu ewu. Yéyè ngwanyì ne mèmè ndi Wendè. Ndi mupyànyì pàmwè Nendè, mu Bukalenge bwa Nzambi.”

⁸⁷ Paasàka! Paasàkà ùdi ùlwa ne cintu kampànda cinène, dibìikà dya ku lufù, ditèkemena dipyadipyà. Udikù wèwè naadi mu dinda emu anyi? Didikù munda mwa mwoyi wèbè anyi? Udi mumanyè ne Mupikudi webè ùdi ne mwoyi, ne Ùdi wènza bwa bintu byònsò bikwacishanganè pàmwè anyi?

⁸⁸ Wèwè udi wamba ne: “Mwanèètù Branham, mèmè's ndi musòmbe kaaba aka, mwindile mulongo wà babèèdi.”

⁸⁹ Nzambi ùdi wènza cyòci aci anu menemene bwa dyàkalenga. Mwànà mukese wa balùmè wa mushinga mukolè awu, ditùkù adi, ùvwa mutuuta kùdi bufofo kacya bàmulèla bwa cinyi? S'mbwà Nzambi àpetè butùmbi ne àtwishè cimenga katungu. Bushuwa's, Nzambi mmumanyè cidiYe wènza. Nzambi mmumanyè. Ne Yéyè ùdi ùtùtèeka pa mushikì wà butù, mbwà kutùleeja butùmbi Bwèndè.

⁹⁰ Pa nanku, mu dinda emu, ndi ngamba nùnkù, mulundà wanyì. Paanyimà pàà bidimu makumi asatu ne cimwè bya mudimu wà bwambi, paanyimà pàà bidimu makumi asatu ne cimwè bya mudimu mukolè mu budimi bwa bwambi, ndi muswè kusàkidila bujaadiki bwànyì ku cyòci eci. Nkààdikù mumònèmòne dyediibwa dya màyì ku makàsà. Nkààdikù mumònèmòne dībà dīndi mulòmbe bintu, ne mudile mwadi bwa kupeta bintu, ne musèngèlèlè bwa kupeta bintu, kàdi mupangile bwa kubipeta. Kàdi mèmè anu mwindile Nzambi ne lutùlù, dībà adi ndi mmanya ne cidi cyènzeke anu mu cyòci menemene, cidileeja anu mu cyòci menemene, cyènza anu menemene cintu cijaalàme.

⁹¹ Pànjimijilè mwanàànyì wa mu dibòko, Sharon wanyì mukese awu, mèmè. . . cìvwa ncintu cyàkandèndwishà's. Mèmè kwamba ne: “Mmunyì mùdiku aci mwa kwikala bwa dyàkalenga? Mmunyì mùdici mwa kwikala bwa dyàkalenga?” Kàdi ngondo pàakapitàyì, pàmmumwènè mwimàne mwaba awu mu bulenga bwa mwànà wa bakàjì nsongà, wàkula naanyì, mwimàne ku luseke lwà kàshinyì kàà mukokakoka kàà kale kafwè aku, kuntu kwàka, ngàkamanya ne, bu ne ùvwa mushààle ne mwoyi, ùvwa mwa kwikala munyangùke. Byàkakèngela bwa Nzambi kumwàngataYè pàcìvwàye mutekète ne mupòle apu. Ndi mumanyè ne nèmumòmòne cyàkàbìdi. Ndi mumanyè ne nèmumòmòne, ndi mucìmanyè kakùyikù mpatà nansha mikese to.

⁹² Ndi mvùluka mukàjàànyì wa bidimu makumì abidi ne bibidi awu, mwangàcìibwe, anu mwànà wa bakàjì wetù ewu, maamù mutekète piine apu. Bibèjibeji pààkapàtùlàbì mutù wà bwalu mwab'ewu ne: "Maamù mutekète, wa kuneemekiiibwa . . . , mmufùme ku difwà," kaa, mushindu mwine wàkazànyikà mwoyi wànyì mashi's wè! Ncyàkamanya cya dyenza to.

⁹³ Kàdi leelu ewu ndi mumanyè ne bìvwa byònsò bìkwàta mudimu bwa dyàkalenga dyànyì. Ndi mumanyè ne bìvwa bìkèngela bwa mwoyi wùvingiibwè, ne wùnyenguvudiibwè, ne wùkamiibwè, bwa kupàtula civwàmù aci, pambèlu. Mùvwa cii-Branham cipite bùngì muntwamu, bìvwa bìkèngela kukàmiibwa kumpàlà kwa Nzambi kumòna mwa kuDimanyisha.

⁹⁴ Kùvwa bya wèwè bùngì bupìte mu wèwè amu, mu mushindu wà ne byàkakèngela bwa Nzambi kubikàmaYè, ùbikàmìna ku mateeta. Ne pàvwà dikàmiibwa adi dyènzeka, s'mbikolè. Kàdi paanyimà pàà cikondo, kuulu kùdi kùtènduka cyàkàbìdì, dìbà adi udi umòna kiipàcìlà kàà Nzambi. Dìbà adi udi wela lubìlà ne: "Ndi mumanyè ne Mupikudi wanyì ùdi ne mwoyi, ne ku matùkù a ndekeelu Yèyè nèimanè pa buloba! Nansha misàndà ya mu dikòba mibùtùle mubidi ewu, nansha nanku mu musunya wànyì nèmmonè Nzambi!" Tuumateeta ne tuntu tukese etu tùdi anu bwa katanci kakese cyanàànà, ne tùdi tùjìmina kakese kakese ne ntwòtò tùyaayà twàtwa. Kàdi ntwenjùbwe anu bwa bìmpè byebye, tùvulukààyi aci ne, Nzambi mmuswè kupeta butùmbi.

⁹⁵ Swàyi bwa twìnyikèku mitù yetu anu bwa katanci kakese cyanàànà. Ndi muswèku kukonka, kumpàlà kwa disambila, kùdikù muntu kaaba aka udi muswè kuvùlukiibwa mu mwakù wà disambila kumpàlà kwa twètù kujikija anyì? Nzambi àkubènèshè. Mbanganyì mwab'ewu bàdiku baswè kwamba ne: "Ndi muswe bwa Nzambi, mu dìbà dya diteeta dyànyì mpindyewu, àmpèèshèku dilabula dipyadìpyà, bwa ngaamònakù mwa kulwa cyàkàbìdì mupyamùpyà"? Ela cyaanza muulu, wámbe ne: "Ndi muswè—ndi muswè bwa eci cìikalèku dibìikà dya ku lufù bwànyì mèmè, Paasàkà, bwa cìnjuulèku mu matèkemena mapyamàpyà ne makolè mapyamàpyà, bukolè bwa mubidi bupyabùpyà ne disànkà dipyadìpyà." Mukalenge ànùbènèshèku, nwènu bananga bàànyì.

⁹⁶ Kaa, Nzambi wetù ne Musùngidi wetù, tudi ne kusàkidila kwàbùngì Kùdì bwa Paasàkà ewu, bwa cìdiye ùmvwija kùdi myoyi yetu. Nenku ku diitabuujà, kwàka naka, mu ditùngà dijimà, tudi mwa kumòna Dilwa dya Mukalenge, Yesu, pàdiYè munkaci mwa kuDilongolola mpindyewu apa, ùvwàla bìvwàlù Byèndè bya bukalenge. Nenku, Ekeleeziya ùdi munkaci mwa kuvwàla, Mubàki munkaci mwa kuvwàla mùzàbì Wèndè muleemùle wà dibanjì awu. Kùdi pabwìpi ne kwenzeka disangisha dinene abidi àdi panshi aa.

97 Mushiki wà butù ewu kawènakù mwa kushààla kashidi to. Patùdi tuumvwa bantu bàseka, bàtwèlulwila, ne bàtùtwa dinà dya cilèndwishi adi dya “bansantu babùnguluki bàà mu malaba” apa, ne bàtwèlulwila, ne bàmba mutùdi katùyi mene ne meeji mu òwò, kaa, kabyènakù mwa kushààla nanku dibà dyònsò to, Mukalenge. Kàdi twikalèku mùvwà Yobò amu, bakwàte bujaadiki bwetu, twikalèku mùvwà Danyèlè ku bwinà bwa ntambwe aku, anyi bânà bàà beena Ebèlù abu ku cikùtù cya kapyà, anyi Abraham mu lwendu lwèndè alu.

98 Tùkwàcishèku, Éyi Mukalenge, bwa kushààla biimàne mu lulamatu too ne patwàmòna cintu cinène aci cyènzeka ne: “Pàadilà mpungi, ne pàajuukà bafwè mu Kilisto; twètù bàdi ne mwoyi ne bashààle netùshintulukè, mu katanci, mu mubùnyi wà dísù.” Ne pashìshe Paasàkà awu neàlwe bwetu twètù, uvwa Kilisto musànkile kacya kùkaadi bidimu bitwè ku cinunu ne nkàmà citeema mu dinda emu awu, ne mwambè ne: “Bu mùndi Mémè ne mwoyi, nenwikalè peenu ne mwoyi.”

99 “Yesu umwèumwè, wàkangaciibwa munkaci mwetu awu, neàpinganè anu mushindu wumwewumwe wàkayàYe awu.” NetùMumònè, nansha mene cibangu cyònsò cya mpùtà mu cyaanza Cyèndè ne cibangu cyònsò cya dyèbà ku mutù Kwèndè. NetùMumònè.

Kaa, nèmMumanyè, nèmMumanyè,
Ne nèngümanè ku luseke Lwèndè mwikàle
mupikula.

100 Eyowa’s, Mukalenge, mwoyi wànyi wùdi mukwàte ne bya luse ewu, pàdi mubidi wànyi mutekète ewu wùbanga kukòbama bwa bujitu apa, maditàcishi ne midimu mikolè ya mu madimi a dinowa, madimi a bwambi, ne mabika ne mala, ne dibènga kucyùkà dya maalu munkaci mwa bambi badyàmbi, ne bikwabo, mu myaba yònsò, ne bantu badyombolangana, ne makolè mabi. Kàdi, Éyi Mukalenge, dîngà ditùkù netùkafikè mwàkafikà Eliyà amu, tupweka too ne ku musùlù; tutàngila kwàka, ku cisuku cyònsò, kuswikila dikalù dya mvità dya kapyà dyàtwàngatà e kuya neetu. Tùmányèku ne mishiki ya butù eyi yidi anu maaridò cyanààna bwa kutùsokoka cintu cinènè cidi anu cisanganyiibwà kumpàla, butùmbi bunene abu.

101 Swàku bwa tùshaalèku ne lulamatu bu Yobò, too ne patwikalàku mwa kuMumònè apu, cìmònààmèèsù. Swàku bwa tùshaalèku bàà lulamatu mùvwà Mukalenge wetù amu, bu cileejilu cyetu, bwa twàya peetu too ne ku Kàlvariò, bwa...badilongòlòle bwa kupoopediibwa pa nkùrusè, ne kupoopediibwa pa nkùrusè pàmwè Nendè, bwa kwikalakù dibìshiiibwa dya ku lufù mu nsòmbelu wetù. Enzàku nanku, Mukalenge.

102 Swàku ne, kwòkù kwikàle badyombodyanganyi kaaba aka, bàvwà mùvwà Pòlò wa kale awu, bàkaadiku beelùlwilàngàne

abu, swàku bwa bàpetè Paasàkà mu njila wa dyalukila kwabo kumbèlu mu dinda emu. Enzàku nanku, Mukalenge.

¹⁰³ Tudi tulòmba, Mukalenge, bwa aba bàdi pa mushiki wà butù wà dibùtuka, mushiki wà butù wà bubèedi abu ne, edi diikalèku dībā dyàsùuludiibwàbo.

¹⁰⁴ Makèèlèlà dilòòlò awu, ngaakula ne mukàji mukese awu ku ditempu dya màshinyi kwàka, ne bàyendè; mùvwàye mu Phoenix mwàmwa, mu ngiikàdilù wa bwalu bukolè, ne tunsèrè tunène atu tumunekè pambidi pajimà, ne patùdi twakulangana leelu ewu apa yèyè's ùdi bilenga bya kacya anu mùdi bantu bònsò emu. Ne mwànà mukese wa mu dibòko uvwabò ne cya kulòpola mwoyi awu, s'nyèyè ewu musòmbe kaaba aka mu citanda emu mu dinda emu, anu mùdi bantu bònsò, musàngàle. Mwànà mukese wa balùme mpofo uvwa musangu kampànda wèndela mu mìdimà ne kacya kàyikù ùmòna muunyà awu, ùdi leelu ewu wèndakana ne ùmòna muunyà. Nenku, Èyi Nzambi, mushindu mwine wutùdi tuKusàkidila bwa cyòci eci's wè! Ne byònsò ebi nkutàngila dyàmwàmwà dya ridò, ku ditùkù dinene dya dibiikà dya ku lufù adi. Enzàku nanku, Taatù. Ne bàmanyèku ne bivwa bikèngela bwa bintu ebi kwikalabì mushindu awu, bwa bòbò aba: bwa mwànà mukese wa balùme mpofo kumònayè, bwa mwànà mukese uvwa ne disaamà dya mwoyi awu wàmònakù mwa kufila bujaadiki kùdi bakwabo. Bintu byònsò ebi bidì bikwàcishangana bwa dyàkalenga dya bàdi baKunangè.

¹⁰⁵ Byònsò mbitùpeepejila bwalu kùvwakù Kampànda uvwa mutùmikidi mu diteeta, kùvwa Kampànda Wàkatàmba diteeta bukolè, ùvwa n'Yesu. Kampànda Uvwa mutùmikidi wa menemene kùdi Taatù awu, mu mushindu wà ne Taatù wàkaMubiisha ku lufù mu dinda dya Paasàkà, bwalu kabìvwakù mwa kwenzeka bwa kushààlaYè mulama kùdi lufù nansha. "Bwalu Neyàkwitabakù bwa Wa Cijila Wanyì àmonè dibola nansha, anyì nNcyàkulekelakù musùukà Wèndè mu iferno to." Bwalu, Wàkasanganyii bwa ne lulamatu, wènta misangu yònsò anu cìvwà cìsànkisha Taatù.

¹⁰⁶ Nzambi, swàku bwa twikalèku misangu yònsò anu ne lulamatu ku mwaba wà mudimu. Nansha mateeta ètù ne ntàtù yetu miikàle bìshi, nì ncinyì cyònsò, swàku bwa twamònakù mwa kwamba, misangu yònsò anu ne: "Ndi mumanyè ne maalu ònsò àdi àkwàcishangana bwa dyàkalenga dya bàdi banangè Nzambi." Enzàku nanku, Taatù.

¹⁰⁷ Tudi tubènesha bantu aba mu dinda emu ne mabènèsha Èbè. Mbalwè pa bwebwebwe bafùme ku mbànzà yabo, mbalwè ku tabernacle. Mbalwè bwa kupeta busàmbi. Swàku bwa bààlukilè mu mààbò mu dinda emu, ne Bukolè bwa Nyuma Mwimpè bùlàkuka kapya mu myoyi yabo, bènda bàya mu njila byenzè mùvwà bàvwà bàfùma ku Emawùsè abu, bàmba ne: "Myoyi yetu kayìvwakù yilàkuka kapya munda mwetu, pàvwàYè

wàkula neetu mu njila apu anyi?” Enzàku nanku, Taatù. Nyewù mbàlambula Kùdi mpindyewu, mu Dinà dya Mukalenge Yesu Kilisto. Amen.

Bimpè, Mwanèètù Neville. Nenku mpindyewu nwavùlukaayi masangisha.

¹⁰⁸ Katwàkwikala ne twarta twà disambila mu dinda emu to, bwalu, twètù ne twarta twà disambila, pàncidì anu ndama bantu abu kacya biimana kuulu mwab’ewu mushindu awu apu, nêngiikalè anu kacya ngèyemena dipà adi. Bikèngela mfikèku mu mushindu wà ntèèkà cyôci aci ku luseke, mwikàlekù mwa kupàtuka apa ne mwa . . . Ndi nciina’s. Ndi anu bu udi ne bwôwà, ne ndi nciina ne nkwèpi kùngààlwà kwenza cilèma. Kupangila kamvitàmvità kakese, kì nkupangila mvità minene to. Patton wàkapangila tumvitàmvità twàbùngì, kàdi kààkapangilakù mvità minene to. Aci ncyà bushuwa. Nenku netùpangilè peetu mu tumvitàmvità twàbùngì, kàdi katwàkupangila mvita minene nansha. Nèngènzè bilèmà byàbùngì, kàdi ncyàkujimija Bwalu bwena diina to. Nzambi ngudi mucifile, ne Nzambi ngwatàngila bwalu bwàci. Cidi—cidi ndilaabiibwa. Nenku mpindyewu dībà dyàkànyì, ngeela meeji ne ki dībà, nenku ndi mbanga, bu mùdibi ne leelu m’Paasàkà, Nèngiikalè mwa kuya—kuya mùmvwà mwenzè kuntu kwàka bwa kusambidila babèèdi amu. Nenku bu mèmè mwa . . . Ndilaabiibwa. Ncintu kampànda cidì ne cya kwenzeka mu mèmè. Ncitu mutàmbe kuciibidila to. Cidi cilwa mu mushindu wà ne, ndi pàmwàpa mwa kupanga kumanya mwa kucijandula anu mu cyôci menemene, kàdi bikèngela anu ntungunukè naaci too ne pàndi ncimanya musangu wònsò. Pa nanku eci neciikalè ditùkù dīngààteetà, ku ngàsà wa Nzambi.

¹⁰⁹ Mukalenge ànùbènèshèku mpindyewu. Mwanèètù Neville. Nenku masangisha neàbangè pa dībà citeema ne tusunsa makumi asatu. Mwanèètù Neville.



NDI MUMANYÈ LUA60-0417s

(I Know)

DILONDANGANA DYA MAYIISHA À PAASÀKÀ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dinda dya dyàlumingu dya Paasàkà pa dijuuka dya dibà, mu matùkù 17 a ngondo mwinâyì, cidimu cya 1960, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org